

# SARS e hlokometse dikgato tsa molao ka mokgatlo wa basebetsi wa Public Servants Association of South Africa (PSA)

**Tshwane 14 Motsheanong 2021** – Ditshebeletso tsa Lekgetho tsa Afrika Borwa di hlokometse hore e nngwe ya balekane ba yona ba mokgatlo wa basebetsi, e leng Public Servants Association of South Africa (PSA) e entse qeto ya ho nka mehato ya molao ka sepheo sa ho fumana tharollo tabeng e mabapi le nyollo ya meputso e pakeng tsa SARS le mekgatlo ya basebetsi.

Pele ho nako ya ho fela ha selemo sa ditjhelete, Khomeshenara ya SARS e buile le basebetsi mabapi le dipuisano tse ntseng di tswela pele le boetapele ka bophara ba bophethahatsi ba Mekgatlo ya Basebetsi mabapi le ditlamorao tsa kabelo ya tekanyetso e filweng SARS, e ntseng e le hlobaboroko.

SARS, ho tshwana feela le ditheo tse ding tsa mmuso, e angwa ke kabelo ya tekanyetso ya naha ho tswa Lefapheng la Ditjhelete. Ke taba e tsejwang ke bohle hore ikonomi e amehile hampe le ho feta pele ke sewa sena se teng. Feela jwalo, tshehetso ka ditjhelete ya SARS le yona e thefulehile hampe.

Ka lebaka la sena se boletsweng ka hodimo, ka Labobedi la 6 Mmesa 2021, SARS le Mekgatlo ya Basebetsi ba bile le kopano ka sepheo sa ho lekola menyetla e ka bang teng tlasa boemo bona bo renang, haholoholo tabeng e mabapi le Boleng ba Basebetsi (Employee Value Proposition). Mekgatlo ya Basebetsi e fane ka ditlahiso mabapi le sena, mme mekgatlo ena e tla tswela pele ho buisana le SARS ka sena.

Ka Laboraro la Mmesa 2021, kopanong eo e seng ya tlwaelo ya NBF, mekga kaofela e ile ya shebana le taba ya ho phethahatswa ha mokgahlelo wa ho qetela wa tumellano ya meputso ya dilemo tse 3. SARS e bolelletse Mekgatlo ya Basebetsi hore ka bomadimabe bonnete ba ditaba ke hore SARS e ka se kgone ho lefa dinyollo tsa meputso bakeng sa 2021/22, hobane kabelo ya yona ya tekanyetso e sa ka ya kenyelletsa ho nyoloha ha meputso.

Ke boikarabelo ba rona bohle ho itshwara ka tsela e nkelang hloohong diphephetso tsena tse tobaneng le naha ya rona. Naha ya rona e tobane le tlhokeho e kgolo ya mesebetsi, mme nnete ke hore, bao ba rona ba leng monyetleng wa ho sebetsa, re lokela ho laola ditebello tsa rona ka nako eo re etsang ditseko tsa rona tse utlwahalang. Ka hoo, ho bohlokwa hore re nke mehato e tlang ho thusa ho laola ho tetebela ho hong ha boemo ba ditjhelete ba naha ya rona.

Re hlompha tokelo ya Mekgatlo ya Basebetsi ya ho etsa tsohle ka sepheo sa ho phethahatsa ditabatabelo tsa ditho tsa ona ka ho lekola mehato e meng ya molao.